

明史稿

十二



明史卷

朱萬年

李中正

何承光

閔生斗

盧謙

梁志仁

上官蓋

馬如蛟

孫士美



張瑤

馬足輕

陸夢龍

尹夢鰲

龔元祥

王國訓

張紹登

蔣佳徵

白慧元



忠義傳三



張光奎

方國儒

龐瑜

韓光祖

王信

洪雲蒸

王燾

徐尚卿

喬若雯



高重光

張秉文

朱萬年黎平人萬曆中舉于鄉歷官萊州知府有惠政  
崇禎五年二月賊魁李九成等既陷登州遂擁衆來犯  
城中士民洶：欲竄萬年下令嚴禁督率吏民憑城固  
守時山東巡撫徐從治登萊巡撫謝璉並在城中賊攻  
圍數月萬年飭守具給軍食未嘗乏絕已而從治中砲  
死外圍益急城中守禦益堅賊知不可下數詭詞乞降  
璉信之以七月七日偕萬年出城往受遂為賊所執萬  
年誰之曰爾執我無益可以精騎從我呼守城者出降  
賊果以精騎五百擁萬年至城下萬年大呼曰我已



擒誓必死彼精銳盡在此可急發砲擊之母以我為慮  
守將楊御蕃不恐萬年復頓足大呼賊怒將殺之大罵  
而死城上人見萬年已死遂發砲賊死遁半事聞贈太  
常寺卿賜祭葬有司建祠官其一子方賊之還掠新城  
也知縣秦三輔訓導王協中禦之並死焉其陷黃縣知  
縣吳世揚罵賊死縣丞張國輔叅將張奇功守備熊奮  
渭力戰死陷平度州知州陳昕聞自縊死三輔世揚贈光  
祿少卿昕聞贈太僕少卿並賜祭葬建祠蔭子協中國  
輔奇功奮渭亦贈恤有差三輔三原人世揚洛陽人所  
聞畿輔人並起家乙榜明世恤忠之典凡身死綱常與

死封疆者皆贈官廕子賜祭葬或錫謚立祠婦女則建坊旌表其典最優厚若所司失奏及後人自陳請者天子輒嚴旨譙讓故一時忠藎之臣鮮不顯暴于世今采摭先後死事者盡著于篇但志所贈之官其他恤典槩可類推故不悉志云

張瑤蓬萊人天啟五年進士授開封府推官為治嚴明絕請寄柳豪強吏民畏若神崇禎四年與杞縣知縣萊陽宋玫並行取入都時沂州宋鳴梧居吏科瑤往謁門者索錢瑤詈之鳴梧不悅援玫為給事而抑瑤僅得府同知瑤大怒摺玫行賄狀列疏上聞吏部尚書閔洪學



等亦劾瑤饋遺奔競鳴梧復極論之遂謫河州判官未  
赴旋里明年正月賊李九成等逼登州瑤率家衆登陴  
拒守無何城陷瑤猶揮石奮擊賊擁至被執大罵不屈  
被殺妻女四人並投井死贈光祿少卿先是賊陷新城  
舉人王與夔張儼然死之其陷他縣者貢生張聯台蔣  
時行亦死之皆格于例不獲旌祀部侍郎陳子壯上言  
舉貢死難無恤典舊制也然名既登于天府恩獨後于  
流官九泉之下能無怨恫比者武舉人李調禦賊捐軀  
已蒙贈恤武途如此文儒安得獨遺乞量贈一官永為  
定制可之乃贈與夔儼然宛平知縣聯台時行順天府

教授其後他方死難若舉人李讓吳之秀賈煜張慶雲  
貢生張茂貞張茂恂皆贈官如前制

張光奎澤州人仕至山東右叅政崇禎五年流賊躡山  
西監司王肇生知歙人吳開先有勇略便宜署為將使  
擊賊二犯澤州開先與戰于城西賊敗去從沁水轉掠  
陽城肇生以開先之兵至開先恃勇渡沁戰于北留墩  
下擊斬數百人砲盡無援一軍盡沒賊乃以八月再犯  
澤州光奎時里居與其兄守脩光璽千總劉自安等率  
衆固守八日援兵不至城陷光奎等並死之澤大州  
也遠近為震動事聞贈光祿寺卿光璽等贈恤有差同



時楊于楷遼州人崇禎元年舉進士授行人五年奉使  
藩府事竣旋里十一月賊紫金梁等自沁州武鄉來寇  
于楷散家貲率士民登城拒守已而力屈城陷于楷被  
執罵賊死知州信陽李呈章及在籍刑部主事張友程  
舉人趙一亨侯標並死之明年六月賊陷和順昌平副  
使藥濟衆罷官家居被傷不屈赴井死贈于楷光祿少  
卿濟衆太僕少卿有徐明揚者浮梁人由選貢生為平  
順知縣六年四月賊來犯或以城小無備乞避之郡城  
明揚不可設策守禦及城破不屈死

李中正盧氏人萬曆末舉會試以天啟二年赴廷對授



承天府推官入為兵部車駕主事崇禎初謝病歸六年  
群盜大亂河北以十一月乘冰堅長驅渡河遂由浞池  
犯盧氏時中州承平久上下恬熙不設脩輟聞寇至吏  
民皇駭知縣金會嘉棄城遁賊遂以十二月二日入城  
中正憤躬勒家衆及里中壯士願從者奮擊衆寡不敵  
力戰死賊縱掠城中執舉人靳謙吉抑使跪謙吉不屈  
大罵而死賊以是冬始入河南自是屢陷名城殺將吏  
延蔓中原數千里不可嚮邇矣

馬足輕者宜陽縣布衣也性篤孝友弟或煩言迫分產  
乃簡取田廬之磽薄者萬曆末歲大凶出粟六百石賑

救焚券千餘金崇禎六年冬流寇渡河而南挈家避之  
石龍崖三女有絕色慮為賊所污悉投崖下死足輕被  
賊執厲聲大罵賊怒并其三子殺之迄死罵不絕口其  
家衆皆遇害惟存次子駿一人後登鄉薦時中州以布  
衣死難者有靈寶許輝新安劉君培馬山李登英偃師  
裴君合陝州張我正張我德孟津孫挺生嵩縣傳世濟  
李珮玉上蔡劉時寵諸人輝幼習道家言為縣中陰陽  
官六年冬為賊所掠誓死不從大罵見殺君培為人有  
義行六年冬寇渡河携子及從孫避難道遇賊欲殺其  
從孫君培曰我尚有見此子乃遺孤幸舍之而殺我賊



如其言二子獲免山性剛直土寇于大中陷新安獲山  
使之負米叱曰我良民汝逆賊安有良民為賊負米者  
耶大罵而死登英遇城破慷慨就義君合幼孤母苦志  
育之君合孝養惟謹寇亂聚衆保沙岸寨寇攻圍十晝  
夜不克說之降大罵不從後寨破被磔我正豪傑自負  
嘗集衆保障鄉里一方賴之十四年寇掠其里勒衆禦  
之馘三賊俄賊大至衆悉奔奮臂獨戰寇愛其勇欲生  
致之詬罵自刎死我德生有義槩里中被寇恐妻子受  
辱驅一家二十七人登樓自焚挺生初讀書試有司不  
利去學星術有奇驗預知十五年有寇禍編茅于河渚

以居賊蹤跡得之語其妻梁氏曰此匹夫狗義之秋也  
夫婦對泣詬賊而死世濟與兄世舟並為土寇于大中  
所執將殺之兄弟相抱持而泣賊憐之議釋其一世濟  
即奪賊刀自殺世舟獲免佩玉者御史與玄孫也崇禎  
末中州蹂躪無完土佩玉憤結遺民捍衛鄉井與鄰境  
數寨相犄角徃々尾賊後奪其輜重賊憚之不敢出其  
境後賊大舉圍別寨佩玉往救衆寡不敵力戰而死里  
人相聚哭之時寵有孝行賊陷城其父宗礼以年老不  
能行命之速避遂自殺時寵慟哭刺殺一子三女夫婦  
並自剄其妹適歸寧亦從死一家死者凡八人



方國儒字道醇歙縣人四歲失怙奉母以孝聞天啟元  
年舉于鄉崇禎間為保康知縣時流寇大入湖廣所至  
摧陷將吏率望風先奔保康小邑素無兵寇以七年正  
月來犯國儒急率鄉兵出禦力不支敗走城遂陷無何  
賊退國儒還入城方再圖戰守踰月寇復至督吏民脩  
城固拒寇後隊來益衆孤城無援復陷國儒冠服坐堂  
中被執大罵身中七刀死是年正月寇陷竹谿執知縣  
余霄將殺之子諸生伯麟請代乃免賊退數日復陷其  
城訓導王紹正遇害穀城舉人常存畏王秉貞以會試  
赴京道遇寇被劫欲推為首領存畏罵不絕口死秉貞

傾貲行賄獲釋後張獻忠據穀城為之謀主鄉里羞之  
他賊犯興山者知縣劉定國督衆堅守城將陷遣吏懷  
印送上官挺身罵賊死

何承光貴州鎮遠人萬曆四十年舉于鄉崇禎中歷官  
夔州府同知時群盜犯荊州者連陷遠安興山歸州遂  
長驅入夔門官軍竟無守險者以七年二月抵夔州城  
下城中名將無守具副使周士登時駐涪州通判黃尚  
儀推官劉應侯奉節知縣談楚良悉遁承光以攝府事  
督吏民城守力竭無援城遂陷承光整冠帶危坐不動  
賊入殺之投屍于江自賊起陝西轉寇山西蔓延畿輔



河南北以及湖廣四川摧陷州縣以數十未有破大郡者至是天下為震動承光後贈夔州知府賊他部自漢中西鄉來者亦以是日犯大寧知縣高日臨見勢弱不能守嚙指書牒乞援于上官而躬率家衆及吏民禦之城北門衆寡不敵為賊擊敗被執脇之降大罵不屈賊碎其體而焚之訓導高錫及其妻女巡簡陳國俊及其妻皆遇害日臨子儼若鄱陽人起家恩貢生賊既陷夔州他賊即以次日陷巫山通江巫山巡檢郭續化禦之陣沒通江署事通判李良基棄城遁指揮王永年力戰死之至四月守脩郭震辰指揮田寔擊賊百丈

閔兵敗被獲罵賊死

陸夢龍字君啟會稽人萬曆三十八年進士授刑部山東司主事進員外郎挺擊獄起諸司官胡士相趙會禎勞永嘉納鄭國泰厚賄附會劉廷元瘋癲之說盡匿張差所供為國泰守庄及龐劉二內侍引進語第云差收積薪草為鄰人李萬倉等所燬差憤赴朝聲寃行至東門遇一人謂持挺入可當寃狀遂悞入東宮迫署印侍郎張問達速讞及王之來發其奸謀士相等悞時夢龍以典試廣東杜門注籍問達強起之令共事士相等不欲再鞫趣問達具疏請旨以疏入必留中其事即寢夢



龍曰已奉旨提問安得再請舍已奉之明綸又請必不  
下之旨可乎問達感額曰然則若何夢龍曰今具疏  
欲提張差耶衆曰然夢龍曰差已在獄又誰提衆曰  
然則提馬三舅輩夢龍曰此皆編氓堂、法司不能制  
一編氓湏天子詔耶士相曰今但云乞勅下三法司  
不湏乞提何人問達哂曰此何語再問夢龍當  
若何曰差所供內犯有姓無名此湏訊寔士相急曰  
此事何敢再訊夢龍曰他小事猶訊而復訊今國家大  
事反草、耶問達亦以為然明日夢龍復反覆言之問  
達悟趣速訊士相猶執不可永嘉曰倘訊而吐不執謀